



REPUBLIKA E SHQIPËRISË

KOMISIONERI PËR MBROJTJEN NGA DISKRIMINIMI
KOMISIONERI

Nr. ____ Prot.

Tiranë, më ____ . ____ . 2026

V E N D I M

Nr. ____ , Datë ____ . ____ . 2026

Bazuar në nenin 32, pika 1, germa “ç” dhe pikën 11, të nenit 33, të ligjit 10221/2010 “Për Mbrojtjen nga Diskriminimi”, të ndryshuar¹, Komisioneri për Mbrojtjen nga Diskriminimi²,

K O N S T A T O N :

Bazuar në nenin 32, pika 1, germa “a”, të ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, Komisioneri ka shqyrtuar ankesën Nr. 222 regj, datë 06.10.2025, të paraqitur nga znj. Blerta Llace kundër Spitalit Rajonal Elbasan. Me vendimin nr. 75, datë 07.04.2026, Komisioneri ka disponuar në lidhje me ankesën, duke vendosur:

- 1. Konstatimin e diskriminimit në formën e viktimizimit, të ankueses Blerta Llace nga ana e Spitalit Rajonal Elbasan, si pasojë e paraqitjes së ankesës për shkelje të parimit të barazisë dhe mosdiskriminimit, pranë Komisionerit për Mbrojtjen nga Diskriminimi.*
- 2. Në referim të pikës 1 të Vendimit, Spitali Rajonal Elbasan, në bashkëpunim me Operatorin e Shërbimeve të Kujdesit Shëndetësor, Drejtoria Qendrore dhe Drejtorinë Rajonale të Operatorit të Shërbimeve të Kujdesit Shëndetësor Elbasan për të rivendosur në vend të drejtën e ankueses, duke e punësuar në një pozicion të ngjashëm pune me pozicionin për të cilin i është refuzuar lidhja e kontratës së punës.*
- 3. Brenda 30 (tridhjetë) ditëve nga marrja dijeni për këtë vendim, Spitali Rajonal Elbasan, Operatori i Shërbimeve të Kujdesit Shëndetësor, Drejtoria Qendrore dhe Drejtoria Rajonale e Operatorit të Shërbimeve të Kujdesit Shëndetësor Elbasan, të njoftojnë Komisionerin, lidhur*

¹ Në vijim do t'i referohemi me akronimin LMD.

² Në vijim do t'i referohemi si Komisioneri ose me akronimin KMD.

me masat e marra për zbatimin e këtij vendimi.

4. *Në referim të nenit 33, pika 11, të Ligjit nr. 10221, datë 04.02.2010, “Për Mbrojtjen nga Diskriminimi”, të ndryshuar, moszbatimi i këtij vendimi sjell si pasojë ndëshkimin me gjobë, sipas parashikimeve të pikës 13, të po këtij neni.*
5. *Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijeni.*

Rezulton e provuar nga lajmërim marrja e shërbimit postar se, Spitali Rajonal Elbasan ka marrë dijeni për vendimin në datën 09.04.2026.

Bazuar në nenin 33, pika 11, të Ligjit “Për Mbrojtjen nga Diskriminimi”, të ndryshuar (LMD), përcaktohet se : “11. Nëse komisioneri urdhëron rregullime ose masa, subjekti kundër të cilit është paraqitur ankesa, raporton brenda 30 ditëve para komisionerit në lidhje me veprimet e ndërmarra për zbatimin e vendimit. Në rast se subjekti, kundër të cilit është paraqitur ankesa nuk e informon komisionerin ose nuk e zbaton vendimin, komisioneri vendos masë për ndëshikimin me gjobë për subjektin kundër të cilit është paraqitur ankesa. Sanksioni me gjobë shfuqizohet nëse subjekti kundër të cilit është paraqitur ankesa, e zbaton vendimin brenda shtatë ditëve pasi është vendosur sanksioni.”

Në kundërshtim me nenin 33, pika 11, të LMD, Spitali Rajonal Elbasan nuk informoi Komisionerin brenda afatit ligjor 30 ditor, në lidhje me veprimet e ndërmarra për zbatimin e vendimit.

Me shkresën nr.1246 prot, datë 30.06.2026, Komisioneri kërkoi nga Spitali Rajonal Elbasan informacion mbi plotësimin e masave të dhëna me vendimin nr.75, datë 07.04.2026. Spitali Rajonal Elbasan nuk ktheu asnjë përgjigje edhe pse rezulton sipas lajmërim marrjes së shërbimit postar se ka marrë dijeni për këtë shkresë në datën 02.07.2026.

Sa më sipër, rezultoi e provuar se, Spitali Rajonal Elbasan, në cilësinë e subjektit të gjetur përgjegjës për sjelljen diskriminuese, jo vetëm që nuk ka zbatuar vendimin nr.75, datë 07.04.2026, të Komisionerit por nuk ka dërguar asnjë informacion pranë Komisionerit jo vetëm brenda afatit 30 ditor, sipas përcaktimit të nenit 33, pika 11, të LMD por nuk ka kthyer asnjë përgjigje edhe pas rikujtesës së dërguar nga Komisioneri me shkresën nr.1246 prot., datë 30.06.2026.

Në këtë mënyrë, Spitali Rajonal Elbasan, nuk ka përmbushur detyrimin ligjor të parashikuar nga neni 33, pika 11, të ligjit nr.10221/2010 “Për Mbrojtjen nga Diskriminimi”, të ndryshuar. Ky mosveprim, kjo mospërmbushje e këtij detyrimi ligjor, në bazë të nenit 33, pika 11, të ligjit të sipërpërmendur, shoqërohet me marrjen e masave administrative, gjobë. Për personat juridik, siç është në rastin konkret Spitali Rajonal Elbasan, në nenin 33 pika 13 të ligjit 10221/2010 parashikohet

se : “Çdo person që shkel dispozitat e këtij ligji dënohet me gjobë si më poshtë”:..... b) personi juridik nga 60.000 deri në 600.000 lekë;.....”

Për sa më sipër, Komisioneri për Mbrojtjen nga Diskriminimi arrin në konkluzionin se, Spitali Rajonal Elbasan, është në shkelje të detyrimit ligjor të përcaktuar në nenin 33, pika 11, të Ligjit nr.10221/2010 “Për Mbrojtjen nga Diskriminimi”, të ndryshuar, shkelje e cila sipas nenit 33, pika 13, të po këtij ligji, është e dënueshme me gjobë.

Në lidhje me masën e gjobës, Komisioneri mban në konsideratë parashikimet dhe kriteret e vendosura në nenin 33, pika 12, të Ligjit nr.10221/2010 “Për Mbrojtjen nga Diskriminimi”, të ndryshuar, ku sanksionohet se: “12. Kur vendos masën, komisioneri siguron që ajo të jetë: a) e efektshme dhe parandaluese; dhe b) në përpjesëtim me gjendjen që e shkaktoi vendosjen e masës. Nëse vendoset gjobë, komisioneri përcakton shumën e gjobës duke marrë parasysh: i) natyrën dhe fushën e veprimit të shkeljes dhe ndikimin mbi viktimën; dhe ii) rrethanat personale e financiare të shkelësit, veçanërisht duke marrë në konsideratë të gjitha burimet e të ardhurave dhe nëse shkelja kryhet nga një person juridik privat, merren parasysh aktivet e bilancit dhe fitimi, si dhe pagat totale të paguara punonjësve; c) nëse e njëjta shkelje diskriminon disa persona, vendoset vetëm një gjobë, por duke marrë parasysh kërkesat e shkronjës “b” të këtij neni.”

Duke mbajtur në konsideratë kriteret e mësipërme për përcaktimin e masës së gjobës dhe bazuar në sjelljen e Spitalit Rajonal Elbasan, i cili jo vetëm që nuk ka zbatuar vendim të Komisionerit por njëkohësisht nuk ka dërguar asnjë informacion, pavarësisht rikujtesës së dërguar me shkresën nr.1246 prot., datë 30.06.2026, Komisioneri, arrin në përfundimin se, Spitali Rajonal Elbasan, duhet të gjobitet me 300 000 (treqind mijë) lekë, për mosinformimin e Komisionerit dhe moszbatimin e vendimit nr.75, datë 07.04.2026.

PËR KËTO ARSYE:

Bazuar në nenin 32, pika 1, germa “ç”, nenin 33, pikat 11, 12, 13, germa “b”, 14 dhe 18, si dhe nenin 33/1 të Ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi,

V E N D O S I :

1. Spitali Rajonal Elbasan, të gjobitet në vlerën 300.000 (treqind mijë) lekë, për moszbatimin e vendimit nr.75, datë 07.04.2026, të Komisionerit për Mbrojtjen nga Diskriminimi.
2. Gjoka të paguhet në Buxhetin e Shtetit brenda 45 (dyzetë e pesë) ditëve nga marrja dijeni.

3. Pagesa e gjobës të bëhet pranë çdo banke në llogarinë e thesarit Tiranë, për llogari të: Komisioneri për Mbrojtjen nga Diskriminimi, NIPT: L02027451K, Kodi: 1091001, Entiteti i Qeverisjes: 001, Distrikti (TDO) 3535, Llogaria ekonomike: 7115499.
4. Zbatimi i vendimit nr.75, datë 07.04.2026, i Komisionerit për Mbrojtjen nga Diskriminimi brenda 7 (shtatë) ditëve nga marrja dijeni e këtij vendimi, sjell shfuqizimin e gjobës.
5. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijeni.

KOMISIONER

Genta TAFA (BUNGO)

Konceptoi: K.Keta, Inspektore DHA
Konfirmoi: V. Bushati, Drejtore DHA
Datë: 07.08.2026